

## 瑜伽師地論敘下

三攝大乘論者。括瑜伽深密法門。詮阿毗達磨攝  
大乘一品宗要。而以簡小入地爲宗。依正教文。  
一阿僧祇授十地經。世親證明得定。將入見修。  
聞十地經。涕淚悲泣。無着授此。俾之作釋。是  
故簡小入地於此獨詳。佛由菩薩修道而成。菩薩  
多聞熏種而入。幸福無邊。逢茲妙典。一切且置。  
應此鑽研。一華嚴教海。非此不入故。二薄伽梵  
十殊勝語。因果始終開示明白故。三獨標所知。  
大所乘故。漏無漏種。共此所依。舍對治外。無  
他謬巧故。四建立賴耶。爲大王路。一切智智。  
大所乘故。五攝三性於唯識。唯識妙義此獨詳  
故。六能入唯識。加行見道。爲最近故。所入唯  
識。方廣十事。平等六度爲因。增上六度爲果故。  
如是能入所入。詳詮入義。大所乘故。七修道差  
別。法爾次第。初地爲得。十地成辦。華嚴修因  
正詮唯此。大所乘故。八別顯六度。約立三學。  
三學增上。大所乘故。九斷謂無住涅槃。大所乘

故。十智謂三身。大所乘故。如是十義。顯示此論爲大王路爲燭幽炬。勝利無邊不可說言。誰有智者而不鑽研。復次十支之中。攝論最勝。百法五蘊。略不及詳故。雜集法相。博不及要故。分別瑜伽但釋止觀。六度三學此獨詳故。辯中邊論明中道義對惡取空。此明十地。正詮所修故。二種唯識立破推廣。提契綱領此最宜故。莊嚴詮大意在莊嚴。此論詮大意獨在入故。顯揚詮教意重聞思。此詮入地意重修慧故。是爲最勝。應此鑽研。是爲攝大乘論以簡小入大爲宗義。